

Član 24.

Podzakonski akt kojim se reguliše profesionalni status poslanika Skupštine Kantona, primjenjivat će se u dijelu koji nije u suprotnosti sa odredbama ovog zakona.

Član 25.

Ovaj zakon stupa na snagu narednog dana od dana objavljivanja u „Službenim novinama Tuzlanskog kantona“, a primjenjivat će se od narednog mjeseca u odnosu na mjesec u kome je stupio na snagu.

Bosna i Hercegovina
- Federacija Bosne i Hercegovine -
TUZLANSKI KANTON

Skupština
Broj: 01-02-641-5/15
Tuzla, 29.9.2015. godine

PREDSJEDNIK
Skupštine Tuzlanskog
kantona,

Senad Alić, v.r.

593

Na osnovu člana 24. stav (1) tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 29.9.2015. godine, d o n o s i

Z A K O N**O IZMJENAMA I DOPUNAMA ZAKONA O
JAVNOM OKUPLJANJU****Član 1.**

U Zakonu o javnom okupljanju („Službene novine Tuzlanskog kantona“, broj 1/12) iza člana 11., dodaje se novi član 11a., koji glasi:

„Član 11a.

(Aktivnosti policijskih službenika nakon prijema prijave mirnog okupljanja i javnog protesta)

(1) Ako prijava ne sadrži sve potrebne podatke propisane u članu 11. ovog zakona, nadležni organ obavezan je od lica koje je predalo prijavu tražiti da istu dopuni u roku od 24 sata od vremena podnošenja prijave.

(2) Ako se u navedenom roku ne izvrši dopuna prijave sa svim traženim podacima, smatrat će se da prijava nije ni podnesena.

(3) Mirno okupljanje, za koje prijava nije podnesena u skladu sa stavovima (1) i (2) ovog člana, smatrat će se kao mirno okupljanje bez prijave iz člana 15. ovog zakona, o čemu će biti upoznat podnosilac prijave.“

Član 2.

U članu 13. dodaje se novi stav (2), koji glasi:

„(2) Ako se javno okupljanje prijavljuje za više lokacija, potrebno je za svaku lokaciju navesti vrijeme početka i završetka okupljanja.“

Član 3.

Iza člana 13. dodaje se novi član 13a., koji glasi:

„Član 13a.

(Vrijeme održavanja mirnog okupljanja)

Mirno okupljanje se može održati u vremenu od 08,00 do 22,00 sata.“

Član 4.

(1) U članu 14., u tački b) riječ „bolnica“ zamjenjuje se riječima „zdravstvenih ustanova“.

(2) U istom članu iza tačke f), dodaje se nova tačka

g), koja glasi:

„g) u blizini objekata koji se posebno osiguravaju, na udaljenosti koju procijeni policijski organ nadležan za osiguranje tog objekta.“

Član 5.

U članu 15. ispred riječi „Općinsko“ dodaju se riječi „Gradsko odnosno“.

Član 6.

U članu 26., iza tačke h) dodaje se nova tačka i), koja glasi:

„i) Ako se mirno okupljanje održava na prostoru suprotno odluci iz člana 15. Zakona“.

Član 7.

(1) U članu 38. u stavu (1) u tački b) iza teksta „čl. 11. stav (1),“ dodaje se tekst „13. stav (2), 13a.,“.

(2) U istom članu i stavu iza tačke j) dodaje se nova tačka k), koja glasi:

„k) održava ili održi javno okupljanje koje nije blagovremeno prijavljeno, kada je prijavljivanje obavezno (član 10. stavovi (4) i (5), član 31. stav (2) i član 36. stav (2)).“.

Član 8.**(Stupanje na snagu)**

Ovaj zakon stupa na snagu narednog dana od dana objavljivanja u „Službenim novinama Tuzlanskog kantona“.

Bosna i Hercegovina
- Federacija Bosne i Hercegovine -
TUZLANSKI KANTON
Skupština

Broj: 01-02-614-4/15
Tuzla, 29.9.2015. godine

PREDSJEDNIK
Skupštine Tuzlanskog
kantona,

Senad Alić, v.r.

594

Na osnovu člana 24. stav 1. tačke c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 29.9.2015. godine, d o n o s i

Z A K O N**O IZMJENAMA I DOPUNAMA ZAKONA O
SOCIJALNOJ ZAŠTITI, ZAŠTITI CIVILNIH
ŽRTAVA RATA I ZAŠTITI PORODICE SA DJECOM****Član 1.**

U Zakonu o socijalnoj zaštiti, zaštiti civilnih žrtava rata i zaštiti porodice sa djecom – prečišćeni tekst („Službene novine Tuzlanskog kantona“, br. 5/12 i 7/14), u članu 1. alineji 3. riječi „i drugih ustanova i službi“ zamjenjuju se riječima „i uslovi za obavljanje djelatnosti socijalne zaštite pravnih i fizičkih lica“.

Član 2.

U članu 6. stav 3. mijenja se i glasi:

„Izuzetno od stava 2. ovog člana, povratnicima iz Kantona koji su se vratili u prijeratna prebivališta na područje Republike Srpske i Brčko Distrikta omogućava se nastavak korištenja prava na socijalnu zaštitu, zaštitu civilnih žrtava rata i zaštitu porodice sa djecom u skladu sa Federalnim zakonom i ovim zakonom“.

Član 3.

U članu 12. dodaje se novi stav 2., koji glasi:

„Pravo na stalnu novčanu pomoć ne ostvaruje lice ukoliko je smješteno u drugu porodicu ili ustanovu socijalne zaštite, na teret sredstava kantonalnog budžeta“.

Član 4.

U članu 15. u stavu 1., iza tačke 6. dodaju se nove tačke 7. i 8., koje glase:

„7. Materijalna naknada za vrijeme nezaposlenosti.

8. Naknada po osnovu alimentacije“.

U istom članu stav 4. mijenja se i glasi:

„Prihodom u smislu stava 1. ovog člana ne smatra se lična invalidnina, novčana naknada za pomoć i njegu od strane drugog lica, ortopedski dodatak, stalna novčana pomoć, dodatak na djecu i stipendije učenika i studenata“.

Član 5.

U članu 16. u stavu 2. riječ „mu“ zamjenjuje se riječju „njegov“.

U istom članu, iza stava 2. dodaje se novi stav 3., koji glasi:
„Ukoliko se radi o srođnicima koji su zbog starosti nesposobni za samostalan rad i privređivanje ili imaju utvrđen gubitak radne sposobnosti od strane Instituta za medicinsko vještačenje zdravstvenog stanja, smatra se da nisu u mogućnosti učestvovati u izdržavanju ukoliko im prihodi po članu domaćinstva ne prelaze 60% prosječne plaće“.

Član 6.

Iza člana 16. podnaslov: „b) Novčana naknada za pomoć i njegu od strane drugog lica“ briše se.

Član 7.

U članu 24. u stavu 1., iza riječi „pomoći“ dodaju se riječi „i članova uže porodice“.

U istom članu, iza stava 1. dodaje se novi stav 2., koji glasi:

„Pod članovima uže porodice, u smislu ovog zakona, podrazumijevaju se bračni partner, djeca i usvojenici“.

Dosadašnji stav 2. postaje stav 3.

Član 8.

Član 26. mijenja se i glasi:

„Lice koje se, radi osposobljavanja za život i rad, upućuje na internatski smještaj ima pravo na troškove smještaja, ishrane i prijevoza od mjesta stanovanja do internatskog smještaja, pod uslovima utvrđenim ovim zakonom“.

Član 9.

Član 27. mijenja se i glasi:

„Troškove internatskog smještaja, ishrane i prijevoza snosi smješteno lice do visine cijene smještaja, ishrane i prijevoza.

Ako smješteno lice nema prihoda, odnosno njegovi prihodi nisu dovoljni za potpuno snošenje troškova smještaja, ishrane i prijevoza iz stava 1. ovog člana, troškove smještaja, ishrane i prijevoza ili njihov dio snose roditelji, usvojitelji ili srođnici koji su po zakonu dužni da ga izdržavaju, ako prihodi po članu njihovog domaćinstva prelaze visinu od 30% prosječne plaće, ili drugo pravno ili fizičko lice koje je preuzelo obavezu izdržavanja smještenog lica.

Ako smješteno lice nema obveznike izdržavanja iz stava 2. ovog člana ili prihodi tih lica ne prelaze visinu od 30% prosječne plaće po članu njihovog domaćinstva, troškove smještaja, ishrane i prijevoza u cjelosti snosi Ministarstvo.

Visinu učešća lica iz stava 2. ovog člana, u troškovima iz stava 1. ovog člana, utvrđuje centar za socijalni rad, u iznosu koji ne može biti veći od 30% od ukupnog prihoda svih članova domaćinstva.

Troškove internatskog smještaja, ishrane i prijevoza za djecu sa smetnjama u psihičkom i fizičkom razvoju snosi Ministarstvo“.

Član 10.

U članu 30. iza riječi „Federalnim“, dodaju se riječi „i ovim“.

U istom članu dodaje se stav 2., koji glasi:

„Prije smještaja lica u drugu porodicu centar za socijalni rad je obavezan pribaviti saglasnost Ministarstva“.

Član 11.

Član 32. mijenja se i glasi:

„Troškove smještaja u drugu porodicu snosi smješteno lice do visine cijene smještaja.

Ako smješteno lice nema prihoda, odnosno njegovi prihodi nisu dovoljni za potpuno snošenje troškova smještaja iz stava 1. ovog člana, troškove smještaja ili njihov dio snose roditelji, usvojitelji ili srođnici koji su po zakonu dužni da ga izdržavaju, ako prihodi po članu njihovog domaćinstva prelaze visinu od 30% prosječne plaće, ili drugo pravno ili fizičko lice koje je preuzelo obavezu izdržavanja smještenog lica.

Ako smješteno lice nema obveznike izdržavanja iz stava 2. ovog člana ili njegovi obveznici izdržavanja nemaju dovoljno prihoda, a smješteno lice ima imovinu, učestvuje u troškovima smještaja sa svojom imovinom u visini i pod uslovima koje propisuje ministar.

Ako smješteno lice ima imovinu, ali ta imovina nije dovoljna za potpuno učešće u troškovima smještaja, troškove smještaja do punog iznosa snosi Ministarstvo.

Ako smješteno lice nema imovinu ili obveznike izdržavanja iz stava 2. ovog člana ili prihodi tih lica ne prelaze visinu od 30% prosječne plaće po članu njihovog domaćinstva, troškove smještaja u cjelosti snosi Ministarstvo.

Visinu učešća lica iz stava 2. ovog člana u troškovima iz stava 1. ovog člana, utvrđuje centar za socijalni rad, u iznosu koji ne može biti veći od 30% od ukupnog prihoda svih članova domaćinstva.

Troškove smještaja za djecu bez roditeljskog staranja i za djecu sa smetnjama u psihičkom i fizičkom razvoju u cjelosti snosi Ministarstvo“.

Član 12.

U članu 34. dodaje se novi stav 2., koji glasi:

„Prije smještaja lica u ustanovu socijalne zaštite centar za socijalni rad je obavezan pribaviti saglasnost Ministarstva“.

Član 13.

Član 35. mijenja se i glasi:

„Troškove smještaja u ustanovu socijalne zaštite snose lica iz člana 32. stavovi 1. i 2. ovog zakona i na način utvrđen u stavovima 3. i 6. istog člana, a Ministarstvo na način utvrđen u stavovima 4., 5. i 7. istog člana.“

Član 14.

U članu 38. u stavu 1., alineja 4. mijenja se i glasi:

„djeca od rođenja do polaska u osnovnu školu, koja nisu osigurana po drugom osnovu“.

Član 15.

Iza člana 39. u podnaslovu „11.“, iza riječi „zaštite“ dodaje se zarez i riječi „i uslovi za obavljanje djelatnosti socijalne zaštite prirodnih i fizičkih lica“.

Član 16.

Član 41. mijenja se i glasi:

„Ministarstvo donosi rješenje o ispunjavanju uslova za obavljanje djelatnosti socijalne zaštite, zaštite civilnih žrtava rata i zaštite porodice sa djecom za pravna i fizička lica koja mogu obavljati ovu djelatnost u skladu sa članovima 3. i 4. Federalnog zakona.

Protiv rješenja Ministarstva nije dopuštena žalba ali se može pokrenuti upravni spor kod nadležnog suda.

Pravilnik kojim se utvrđuju uslovi u pogledu prostora, opreme i kadra za obavljanje djelatnosti socijalne zaštite, zaštite civilnih žrtava rata i zaštite porodice sa djecom donijet će ministar.

Član 17.

Član 42. mijenja se i glasi:

„Kad utvrdi da pravna i fizička lica iz članova 3. i 4. Federalnog zakona ne ispunjavaju zakonom propisane uslove za obavljanje djelatnosti socijalne zaštite, zaštite civilnih žrtava rata i zaštite porodice sa djecom, Ministarstvo određuje rok u kojem su isti dužni otkloniti utvrđene nedostatke.

Ukoliko lica iz stava 1. ovog člana ne otklone nedostatke u utvrđenom roku, Ministarstvo donosi rješenje da ista ne ispunjavaju uslove za početak obavljanja djelatnosti i rješenje dostavlja nadležnom organu na dalje postupanje“.

Član 18.

U članu 44. stav 2. mijenja se i glasi:

„Javnu ustanovu u oblasti socijalne zaštite može osnovati Skupština Kantona i općinsko vijeće samostalno ili sa drugim pravnim i fizičkim licem“.

U istom članu, iza stava 2. dodaje se novi stav 3., koji glasi:

„Javnu ustanovu u oblasti socijalne zaštite može osnovati crkva i vjerska zajednica, samostalno i sa drugim pravnim i fizičkim licem, kada Skupština Kantona utvrdi da za to postoji javni interes“.

Član 19.

U članu 45. u stavu 1., riječi „Ustanove su dužne“ zamjenjuju se riječima „Pravna i fizička lica iz članova 3. i 4. Federalnog zakona su dužna“.

Član 20.

U članu 46. u stavu 1., riječ „ustanova“ zamjenjuje se riječima „pravni i fizički lica iz članova 3. i 4. Federalnog zakona“.

Član 21.

U članu 62. stav 2. mijenja se i glasi:

„Domovi i drugi oblici smještaja osiguravaju smještaj i zaštitu lica iz stava 1. ovog člana do završetka redovnog školovanja, a izuzetno i za lica iz stava 1. ovog člana koja se ne nalaze na redovnom školovanju a koja su nakon 18. godine života prestala ispunjavati uslove za korištenje usluga smještaja a najduže do dvije godine od dana smještaja, a na prijedlog centra za socijalni rad“.

U istom članu, iza stava 2. dodaje se novi stav 3., koji glasi:

„Pod redovnim školovanjem podrazumijeva se školovanje u osnovnim, srednjim i višim školama, akademijama ili fakultetima, a najduže do 27. godine života“.

Dosadašnji stavovi 3. i 4. postaju stavovi 4. i 5.

U istom članu, iza stava 5. dodaje se novi stav 6., koji glasi:

„Troškove smještaja korisnika u domove i druge oblike smještaja za lica iz stava 1. ovog člana, na osnovu

zaključenog ugovora između Ministarstva, domova i drugih pružalaca usluga, snosi Ministarstvo“.

Član 22.

Iza člana 64. podnaslov „21. Nadzor nad stručnim radom ustanova socijalne zaštite“, mijenja se i glasi:

„21. Nadzor nad stručnim radom pravnih i fizičkih lica koji obavljaju djelatnost socijalne zaštite“.

Član 23.

U članu 65. riječi „ustanova socijalne zaštite“ zamjenjuju se riječima „pravni i fizički lica iz članova 3. i 4. Federalnog zakona“.

Član 24.

U članu 67. stav 1. mijenja se i glasi:

„Nadzor vrši komisija koju imenuje ministar“.

U istom članu stavovi 2. i 3. brišu se.

Član 25.

Član 68. mijenja se i glasi:

„Pravna i fizička lica iz članova 3. i 4. Federalnog zakona dužna su omogućiti vršenje nadzora u skladu sa zakonom“.

Član 26.

U članu 69. riječi „ustanova socijalne zaštite“ zamjenjuju se riječima „pravni i fizički lica iz članova 3. i 4. Federalnog zakona“.

Član 27.

U članu 71. riječi „ustanovu socijalne zaštite u kojoj“ zamjenjuju se riječima „pravna i fizička lica iz članova 3. i 4. Federalnog zakona kod kojih“.

Član 28.

Član 72. mijenja se i glasi:

„U roku od 15 dana po isteku roka iz člana 71. ovog zakona pravna i fizička lica iz članova 3. i 4. Federalnog zakona u kojima je nadzor izvršen dužni su da pismeno izvijeste Ministarstvo o izvršenju utvrđenih mjera.

Ukoliko lica iz stava 1. ovog člana ne podnesu izvještaj u roku iz stava 1. ovog člana ili ne izvrše utvrđene mjere, Ministarstvo podnosi zahtjev za pokretanje prekršajnog postupka protiv navedenih lica u skladu sa zakonom“.

Član 29.

U članu 74. u stavu 1., riječi „Ustanova socijalne zaštite obavezno organizuje i provodi“ zamjenjuju se riječima „Pravna i fizička lica iz članova 3. i 4. Federalnog zakona obavezno organizuju i provode“.

U istom članu u stavu 2., riječi „ustanove socijalne zaštite“ zamjenjuju se riječima „pravni i fizički lica iz članova 3. i 4. Federalnog zakona“.

Član 30.

U članu 84. u stavu 2. tački 2., riječi „ako su nesposobni za samostalan život i rad, a nesposobnost je nastupila“ zamjenjuju se riječima „ako su sa smetnjama u fizičkom ili psihičkom razvoju a smetnje su nastupile“, a riječi „za cijelo vrijeme trajanja nesposobnosti“ zamjenjuju se riječima „a najduže do navršene 27. godine života“.

Član 31.

U članu 90. u stavu 1., riječi „porođaja“ zamjenjuju se riječima „stupanja na porodiljsko odsustvo“.

U istom članu, u stavu 4. iza riječi: „odnosu“ dodaje se zarez i riječi „a u skladu sa rješenjem centra za socijalni rad u sklopu redovnih isplata plaća“.

U istom članu, iza stava 4. dodaju se novi stavovi 5. i 6., koji glase:

„Lica iz člana 89. ovog zakona obavezna su podnijeti zahtjev za utvrđivanje prava na naknadu plaće i visinu te naknade mjesno nadležnom centru za socijalni rad u roku od šest mjeseci od dana stupanja na porodijsko odsustvo, a najkasnije do isteka porodijskog odsustva.

Ukoliko lica iz stava 5. ovog člana ne podnesu zahtjev u roku iz stava 5. ovog člana gube pravo na naknadu plaće“.

Dosadašnji stav 5. postaje stav 7. i isti se mijenja i glasi:

„Pravilnik o načinu, postupku i rokovima za ostvarivanje prava iz člana 89. ovog zakona i načinu obračuna, isplate i povrata naknade plaće iz stava 1. ovog člana donosi ministar“.

Član 32.

U članu 91. u stavu 2., riječi „ili zasebno“ brišu se.

U istom članu, iza stava 3. dodaje se novi stav 4., koji glasi:

„Povrat isplaćenih sredstava na ime naknade umjesto plaće ženi – majci, odnosno ocu djeteta ili usvojitelju ili staratelju u radnom odnosu za vrijeme dok odsustvuje s posla radi trudnoće, porođaja, odnosno njege djeteta, uključujući doprinose iz člana 91. stav 1. ovog zakona izuzev doprinosa na plaću na teret poslodavca u visini propisanoj odredbama Zakona o doprinosima, vrši Ministarstvo u skladu sa rješenjem o priznavanju prava na naknadu plaće nadležnog centra za socijalni rad i zahtjeva poslodavca za povrat isplaćene naknade plaće uz potrebnu finansijsku dokumentaciju“.

Član 33.

Iza člana 108. dodaje se novi član 108a., koji glasi:

„Član 108a.

Centri za socijalni rad će donijeti rješenje o prestanku prava priznatih na osnovu odredaba ovog zakona kada na osnovu službene provjere ili podataka dostavljenih od korisnika prava utvrdi da je korisnik prestao ispunjavati uslove za ostvarivanje prava.

Korisniku prava po ovom zakonu prestaju ta prava napuštanjem Bosne i Hercegovine duže od tri mjeseca, računajući od dana napuštanja Bosne i Hercegovine.

Povratkom u Bosnu i Hercegovinu korisnik prava po ovom zakonu, može podnijeti zahtjev za ponovno uspostavljanje tog prava“.

Član 34.

Član 113. mijenja se i glasi:

„Centar za socijalni rad će povremeno, a najmanje jednom godišnje, preispitati postojanje činjenica i okolnosti koje su bile odlučujuće za utvrđivanje prava priznatih na osnovu odredaba ovog i Federalnog zakona i donijeti novo rješenje samo ako su se promijenile okolnosti o kojima zavisi ostvarivanje ili obim priznatog prava“.

Član 35.

Član 114. mijenja se i glasi:

„Ministarstvo će, na osnovu ukazane potrebe, vršiti reviziju rješenja o priznatim pravima iz ovog zakona.

U vršenju revizije Ministarstvo stavlja na prvostepeno rješenje zabilješku da je revizija izvršena i da je rješenje u skladu sa zakonom ili ukida, odnosno poništava i vraća prvostepeno rješenje na ponovno odlučivanje, ako rješenje nije u skladu sa zakonom.

Postupak revizije ne odlaže izvršenje rješenja“.

Član 36.

U članu 115. stav 1. mijenja se i glasi:

„Obračun novčanih pomoći i naknada po ovom zakonu vrši nadležni centar za socijalni rad, a isplatu Ministarstvo na teret Budžeta Kantona“.

U istom članu stavovi 2., 3. i 4. brišu se.

Dosadašnji stav 5. postaje stav 2.

Član 37.

U članu 116., iza stava 2. dodaje se novi stav 3., koji glasi:

„Ukoliko su korisniku priznata ili isplaćena primanja na koja nije imao pravo po ovom zakonu ili mu ne pripadaju u tom obimu zbog nezakonito provedenog postupka od strane centra za socijalni rad, a za koja korisnik nije znao ili nije bio dužan znati, povrat tog iznosa u Budžet Kantona obavezan je izvršiti centar za socijalni rad koji je priznao navedena prava“.

Član 38.

U članu 120. riječ „ustanova“ zamjenjuje se riječima „pravni i fizičkih lica iz članova 3. i 4. Federalnog zakona“.

Član 39.

U članu 121. u stavu 2., riječi „ustanova socijalne zaštite“ zamjenjuju se riječima „pravni i fizičkih lica iz članova 3. i 4. Federalnog zakona“.

U istom članu, u stavu 3. iza riječi „mjera“ dodaju se riječi „u skladu sa Zakonom o inspekcijama Tuzlanskog kantona“.

Član 40.

Član 122. mijenja se i glasi:

„Novčanom kaznom od 500,00 do 1.000,00 KM kaznit će se za prekršaj pravno lice, ako:

- korisniku, protivno odredbama ovog zakona, uskrati ili smanji iznos isplata koje mu pripadaju,
- omogućiti isplatu licu koje na istu nema pravo po ovom zakonu ili mu ne pripada isplata u tom iznosu,
- ne vodi propisanu evidenciju o korisnicima i pruženim uslugama (član 45. stav 1.),
- ne omogućiti vršenje nadzora (član 68.),
- u roku od 15 dana ne podnese izvještaj o izvršenju utvrđenih mjera (član 72.),
- u roku od 15 dana ne uplati naplaćeni novčani iznos za vrijeme „Dječije nedjelje“ (član 104. stav 1.).

Za prekršaj iz stava 1. ovog člana kaznit će se fizičko lice novčanom kaznom od 100,00 do 400,00 KM.

Za prekršaj iz stava 1. ovog člana kaznit će se odgovorno lice u pravnom licu novčanom kaznom od 100,00 do 400,00 KM.

Novčanom kaznom od 100,00 do 400,00 KM kaznit će se za prekršaj odgovorno lice u Ministarstvu ako uplaćena novčana sredstva u Budžetu Kantona, sa pozicije „Dječija nedjelja“, ne raspoređuje u skladu sa članom 105. ovog zakona.

Novčanom kaznom od 100,00 do 400,00 KM kaznit će se za prekršaj korisnik prava ako ne prijavi promjenu koja je od uticaja na ostvarivanje i obim tog prava, u roku od 30 dana od dana nastale promjene (član 110.).“

Član 41.

Ministar će, u roku od 90 dana od dana stupanja na snagu ovog zakona, donijeti pravilnik kojim se utvrđuju uslovi u pogledu prostora, opreme i kadra za obavljanje djelatnosti socijalne zaštite, zaštite civilnih žrtava rata i zaštite porodice sa djecom (član 41. stav 3. Zakona).

Član 42.

Pravna i fizička lica iz članova 3. i 4. Federalnog zakona dužna su u roku od šest mjeseci od dana stupanja na snagu ovog zakona uskladiti organizaciju, djelatnost, norme stručnog kadra i opće akte sa odredbama ovog zakona i propisa donesenih na osnovu ovog zakona.

Lica iz stava 1. ovog člana dužna su u roku od 30 dana po proteku roka iz stava 1. ovog člana podnijeti zahtjev Ministarstvu za utvrđivanje ispunjavanja općih i posebnih uslova za početak, odnosno nastavak rada i obavljanja djelatnosti.

Član 43.

Centri za socijalni rad će, u roku od šest mjeseci od dana stupanja na snagu ovog zakona, izvršiti usklađivanje rješenja o priznatim pravima sa odredbama ovog zakona.

Član 44.

Ovaj zakon stupa na snagu osmog dana od dana objavljivanja u „Službenim novinama Tuzlanskog kantona“.

Bosna i Hercegovina
- Federacija Bosne i Hercegovine -
TUZLANSKI KANTON
Skupština
Broj: 01-02-323-12/15
Tuzla, 29.9.2015. godine

PREDSJEDNIK
Skupštine Tuzlanskog
kantona,
Senad Alić, v.r.

595

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04) i člana 63. stav 3. Zakona o zdravstvenoj zaštiti („Službene novine Federacije Bosne i Hercegovine“, br. 46/10 i 75/13), Skupština Tuzlanskog kantona, na sjednici održanoj 29.9.2015. godine, d o n o s i

O D L U K U**o davanju saglasnosti****Član 1.**

Daje se saglasnost na Statut Javne zdravstvene ustanove Opća bolnica „Dr. Mustafa Beganović“ Gračanica, broj: 03-04-03/15 od 21.9.2015. godine.

Član 2.

Odluka stupa na snagu danom donošenja i bit će objavljena u „Službenim novinama Tuzlanskog kantona“.

Bosna i Hercegovina
- Federacija Bosne i Hercegovine -
TUZLANSKI KANTON
Skupština
Broj: 01-02-642-4/15
Tuzla, 29.9.2015. godine

PREDSJEDNIK
Skupštine Tuzlanskog
kantona,
Senad Alić, v.r.